

藝術典第三百八十二卷

醫部彙考三百六十二

外科癰疽疔毒門四

明李梴醫學入門 癰疽證治

癰者壅也爲陽屬六腑毒騰於外其發暴而所患浮淺不傷筋骨疽者沮也爲陰屬五臟毒攻於內其發緩而所患深沉傷筋蝕骨凡年壯氣血勝毒則順年老毒盛氣血則險有內因飲食積毒者經曰膏粱之變足生大疔勞氣不從逆於肉理榮氣卽胃氣胃和則榮衛順而滋養皮膚膏粱金石厚衣烘被以致蘊熱臟腑濕熱聚下燒爍腎水陰火熾盛八脈沸騰經隧凝滯故水穀精微不能上行陽道反逆聚肉之腠理而成癰有外感風寒濕氣蘊毒者經曰地之濕氣感則害人皮肉又曰諸癰腫筋攣骨痛者此寒氣之腫八風之變也蓋風濕外侵鬱久爲熱自膀胱左遷移熱小腸小腸移熱於膽風性上衝瘡形高色赤作痛小則爲癰大則爲癰而已非若疽之自裏也有因心氣鬱結饑飽勞役房室過度水竭火炎痰氣凝滯而成所謂相火能爲瘡瘍諸痛瘡瘍皆屬心火是也因火有

君相瘡分微甚或鬱痛而不甚腫或虛腫而不甚痛雖然病該三因總皆濕熱丹溪云人身血行脈中氣行脈外氣血周流不息惟寒濕搏之則凝滯而行遲火熱搏之則沸騰而行速氣爲邪鬱津液爲痰爲飲積久滲入脈中血爲之濁此陰滯於陽而爲癰血爲邪鬱隧道或溢或結積久溢出脈外氣爲之亂此陽滯於陰而爲疽蓋陽氣無形陰血有質必濕熱泣血而後發爲癰疽故局方曰癰疽皆熱盛血也又曰二熱相搏熱化爲膿蓋熱非濕則不能腐壞肌肉爲膿譬如夏熱諸物皆不壞爛壞爛者必在交秋濕熱大行之際此理甚明 癰疽有大而愈者有微如豆而死者陽發初起皮薄作熱色赤焮腫疼痛潰後肉色紅活此爲外發更加身健能食發熱便秘脈數有力爲純陽易治陰發初起皮厚不熱色黯微腫硬如牛領之皮不痛陷軟不作膿不潰微開闕破後肉色紫黑此爲內發未潰臟腑已經壞爛更加身倦少食不熱便利脈軟無力爲純陰不治又有半陰半陽似腫非腫似痛非痛似赤非赤似潰非潰脈數無力如陽多陰少用藥托裏變陽者生陰多陽少用藥托亦不起投陰必死就中尤以有熱無熱爲死生妙訣蓋陽證有熱則氣血行而生肌陰證無熱則氣血滯而不斂遇有熱者切不可退熱但宜溫藥清滲些小癰毒無熱亦不妨 癰疽雖止發於一經

或兼二經多有挾風挾濕挾痰挾氣挾血挾陰虛等證大槩風氣食三種俱以不換金正氣散加川芎木香爲主兼風多痒加祛風藥兼氣多痛加調氣藥兼食多發寒熱加消積藥兼濕多腫加滲濕藥又云熱瘡焮痛虛瘡淡白風寒瘡口帶白古方外因四氣單用大黃半生半熟甘草節等分爲末每空心酒下一匙以利爲度內因七情單用遠志爲末酒調二錢澄清服以查敷患處不內外因金石炙燂房勞國老膏一切熱毒槐花酒金石藥毒則堅硬如石不痛宜甘草黑豆煎湯解之虛勞瘦弱榮衛否澀患處重著如負石然因其有骨蒸潮熱也治宜滋補故不可用賽命丹等香燥疎泄之藥亦不可過用降火滯脾之藥惟腎氣丸托裏散甚得其宜且古方謂毒藥衝蒸癰疽極重

近

骨者多冷久則化血爲蟲多痒少痛近虛者多熱久則傳氣成漏多痛少痒

腦發屬腎脈足太

陽經鬢發手足少陽經眉發手足太陽少陽經頤發髭發足陽明經腮發手陽明經背發中屬督脈餘皆足太陽經腋發手太陽經乳發內陽明外少陽經乳頭足厥陰經腎癰足太陽經外腎癰足厥陰經腿發外足三陽內足三陰經喉癰臍癰任脈足陽明經穿襠發督衝任三脉跨馬癰囊癰足厥陰經內疽肺癰手太陰經腸癰手太陽陽明經胃脘癰足陽明經若少陽少陰太陰多氣少血厥陰

太陽多血少氣肉皆難平惟手足陽明氣血俱多分經用藥則不犯經禁病禁以致妄下妄汗且瘡屬腎經者最重脾肺二經者次之他經者又次之腦乃諸陽所在咽喉飲食所通腎命根所係皆至險之地又不可多著艾灸俗拘於人形瘡樣而忽經絡謬哉 毒因外感發者內無便溺阻隔

外有六經形證腫痛雖甚飲食如常脈浮數邪在表也宜托裏微汗以表散之如發腦項背分黃連消毒散尻臀分內托羌活湯臂上白芷升麻湯乳脅內托升麻湯兩脅十味中和湯腿外側內托酒煎湯腿內近膝股內托芪柴湯通用敗毒散九味羌活湯辛熱手足太陰經分自汗浮腫流注四肢附子六物湯辛溫發熱十六味流氣飲養命丹暑月內托復煎散寒月內托十宣散或不換金正氣散丹溪治形實脈浮數冬月背生紅腫及胛骨不痛者用桂麻各半湯加生附酒藥苳蓼仁甘草節羌活青皮人參黃芩半夏薑煎服六貼而愈此正內托法也有謂瘡家身痛不可汗汗之則發瘡者邪不在表而誤汗也 內傷飲食積毒者腫痛異常外無六經形證內有便溺阻隔口渴煩躁脈沉實爲邪在裏急與寒涼攻裏內疎黃連湯瀉心湯活命飲四順清涼飲輕者清熱消毒飲加紫草或清心散滲之 內積熱毒外又感邪宜發表攻裏五香連翹湯防風通聖散毒盛者解毒湯下

神芎丸濕盛者除濕丹

毒因內傷虛損房勞鬱怒而發者形雖腫痛外無六經之形證內無便

溺之阻隔知邪在經也不可妄施汗下只宜補形氣調經脈和榮衛或專補脾胃可也鬱怒者十六
味流氣飲虛勞者托裏消毒散內托復煎散補中益氣湯古人治癰以寒藥者正治法也治疽以熱
藥者從治法也蓋藥性熱則宜行寒則疎泄疽乃有形之物非熱藥從治豈能行之乎此內托內疎
正治從治之義也 潰後氣血大虛惟恐毒陷托裏之法一日不可缺也古方托裏散托裏清中

湯托裏定中湯托裏和中湯托裏建中湯托裏抑青湯托裏益黃湯托裏益氣湯選用蓋托裏則氣
血壯而脾胃盛膿穢自排毒氣自解死肉自潰新肉自生瘡口自斂若不務補托而誤用寒涼反助
邪火膿多臭穢甚則脈洪大渴真氣虛而死矣丹溪云但見腫痛參之脈證虛弱更與滋補乃可萬
全又不必泥氣質素實及參芪滿中滯痰也但初潰時間有熱毒盛者量加消毒清劑如發背搭肩
膜破穿心必死尤宜托裏免致毒陷托裏卽護心也若毒氣上攻心神昏悶欲嘔者間脹護心散以
救之如帶表邪面赤等證熱未甚起者內托復煎散或內托十宣散暫服若無熱毒表邪但見穢氣
觸犯虛熱少食不睡者便進人參黃芪湯但見膿多心煩少睡者便進聖愈湯但見脾虧氣弱不能

生肌收斂者便進補中益氣湯但見腎虛不能消潰收斂或哺熱作渴者便進八味丸或腎氣丸緊急不及作丸大料煎服預防救危始終妙劑若不務根本而專用敷圍生肌之藥則斂口太速毒反內攻或旁邊再發一癰者有之或愈後而惡證頓起大命隨去者有之惟務內治而不貴外治者爲高形傷則痛氣傷則腫或先痛後腫傷乎血先腫後痛傷乎氣腫痛並攻氣血俱傷皆因臟腑不和而非外治能調古法隔蒜灸法豆豉餅惟外傷成瘡者不宜自內發者痛則灸至不痛不痛則灸至痛時方佳早覺早灸爲佳一日二日十灸十活三日四日十灸七活五日六日十灸四活過七日則不可灸矣其餘點割敷透間有毒盛者量用之則可癰疽毒氣已成宜托裏以速其膿膿

成者當驗其生熟淺深而針之若腫高而軟者發於血脈腫下而堅者發於筋脉肉色不變者附於骨也按之熟者有膿不熟者無膿按之便痛者膿淺大按方痛者膿深按之陷而不起者膿未成按之而復起者膿已成按之都軟者無膿不痛者血瘤痛者氣瘤按之一邊軟者有膿若膿生而用針氣血既泄膿反難成若膿熟而不針腐潰益深瘡口難斂若瘡深而針淺內膿不出外血反泄瘡淺而針深內膿雖出夏肉受傷元氣虛者必先補而後針其膿諸證自退若瘡毒熾盛中有肉黯者宜

內壯脾胃外塗單巴豆膏令其黯處漸低赤處漸高六七日間赤黯之處自有裂紋如刀割狀黯肉漸潰當用鉞針利剪徐徐引去若膿出肉腐腫痛仍作必內有筋間隔宜再引之急補脾胃不痛者純用補藥庶可收斂若妄施針刀傷肉出血斷之不止者立危其鉞針用馬銜鐵爲之 人身氣

血遇溫則散遇寒則凝槩敷寒涼閉塞腠理氣凝血瘀舊肉不潰新肉不生則毒反內攻難以潰斂甚則不起必內分陰陽用藥外分陰陽敷圍內外夾攻藥氣相通爲妙純陽證內服內疏黃連湯清熱消毒飲之類外敷抑陽散半陰半陽證內服托裏消毒散外敷陰陽散純陰證內服補中益氣湯加薑附入酒煎外敷抑陰散 點瘀爐灰膏以去惡肉藥線三品錠子以透膿管皆欲敗腐盡除不至侵蝕筋骨非得已而用之也 癰疽不可不痛不可大痛未潰前痛者爲熱毒便秘宜內疎

黃連湯解毒湯作膿痛者排之膿脹痛者針之已潰膿出反痛者虛也氣虛四君子湯加歸芪血虛四物湯加參芪氣血俱虛托裏益氣湯脾虛者托裏和中湯腎虛者腎氣丸因登廁犯穢氣觸者藥中加乳香芷芍之類和之風寒逼者加防風桂枝之類溫散之燥者潤之濕者導之果係瘀血惡肉凝滯者方可乳香止痛散和之 瘡口不斂由於肌肉不生肌肉不生由於腐肉不去腐肉不去

由於脾胃不壯氣血不旺必以補托爲主而佐以行經活血之藥則肌肉受毒者自生死者自潰又何待於點割也大要氣虛體倦食少者補中益氣湯血虛晡熱內熱者四君子湯加歸地牡丹皮膠水清稀者氣血俱虛十全大補湯或不痛或大痛或不赤或內膿不潰或外肉不腐者氣血虛敗桑枝灸法十全大補湯加薑桂壯其陽氣則四畔卽消瘡頭卽腐若脾胃虛弱漫腫不赤者六君子湯倍白朮若初起腫痛或因尅伐及入房以致色黯而不痛者乃陽脫變陰急用古參附湯以救之間有血分虛熱者瘡口肉色必赤四物湯加山梔連翹氣分虛熱煩渴者竹葉黃芪湯要知瘡口難斂或漸大漸開出血者危俗皆以腫痕所至爲暈非眞暈也暈生於瘡口之畔狀如紅筋二暈三暈尙可四暈五暈者死 洗藥疏通氣血膿血焮聚之時所賴朝夕煖酢蘸洗敗肉或洗毒散肉汁湯

風冷瘡口白者乾艾煎湯亦好

膏藥多熱輕小瘡癰貼之卽消發表不達熱之意也若大毒初

起用之迷塞凝滯爲禍不小惟潰後只用白臘膏太乙膏或水粉膏外護不致破傷風寒 婦人

調血間鬱爲主值經閉及潰後月水又發所患堅硬不破不腫不疼者凶小兒主生胎毒或有飲食積熱者藥消宜清涼如素稟受體薄及稍長而久病者仍以補托氣血脾胃爲主治之 脈證俱

熱者未潰先內消解潰已潰後托裏消毒脉證俱虛者未潰前托裏消毒已潰後托裏補中治其瘡而諸證自退瘡爲本病爲標若病急而元氣實暫治其標病緩而元氣虛只治其本心通諸竅臟腑所包者一膜耳若憂驚入心膜破必死藥中常加茯神遠志爲妙 五善動息自寧飲食知味一

也便利調勻二也膿潰腫消水鮮不臭三也神彩精明語音清朗四也體氣和平五也此屬腑證病微邪淺若能慎節勿藥自愈 九惡乃五臟虧損之證外似有餘而內實不足法當純補胃氣多

有可生不可因其惡而遂棄不治大抵元氣虛弱或膿水出多氣血虧損或汗下失宜榮衛消燦或寒涼剋伐氣血不足或峻厲猛劑胃氣受傷以致真氣虛而邪氣實矣 大渴發熱或泄瀉淋閉

者邪火內淫一惡也

凡瘡腫發熱潮熱煩躁或失血過多或潰膿大泄或汗多亡陽或下多亡

陰以致陰血耗散陽無所附浮於肌表而非火也若發熱不寢虛熱也聖愈湯兼汗不止氣虛也單人參湯發熱煩躁肉腠筋惕氣血俱虛也八物湯大渴面赤脈洪大而虛陽虛發熱也古歸芪湯微熱煩躁面赤脉沉而微陰盛發躁也四君子湯加薑附 凡渴不可專泥於火若痲痛發熱便利

調和者竹葉石膏湯腫痛發熱大便秘澀者四順清涼飲痲痛熾盛者活命飲膿水多者聖愈湯胃

傷內亡津液者錢氏白朮散腎水乾涸者八味丸有先作渴小便頻數而後患疽者或愈後作渴或舌黃乾硬小便頻數而後患疽者尤其惡也宜預服八味丸補中益氣湯以滋化源可免是患蓋癰疽未有不因腎虛而作切忌知母黃蘗損陽則陰氣無由而生 泄瀉因寒涼傷脾者六君子湯

加砂仁或托裏建中湯托裏溫中湯脾虛下陷者補中益氣湯吞二神丸命門火衰者八味丸料煎吞四神丸腎虛不固者古薑附湯加吳萸五味子大孔痛者附子理中湯四逆湯凡癰疽嘔瀉腎脈虛者死 便秘因熱毒入臟嘔哕心逆發熱腫硬便秘結固宜通之又有伏熱陽氣怫鬱面赤便秘

者爲邪火在經宜汗以發之潰後氣血虛涸便秘者十全大補湯或因入房傷腎便秘者加薑附以回陽氣則大便自潤凡便秘能食而肚腹不脹者切不可下若腹痞脹而秘者豬膽法用豬膽一枚剪去頭入鹽酢少許以鵝管插入膽中灌穀道內須臾自通 小便淋瀝頻數短少或莖中澀痛

皆腎虛惡證 膿血既泄腫痛尤甚膿色臭敗者胃虛火盛二惡也人參黃芪湯或十全大補湯

加麥門冬五味子 目視不正黑睛緊小白睛青赤腫人上視者肝腎陰虛而目系急三惡也腎

氣丸料或八物湯俱加炒山梔麥門冬五味子 喘粗短氣恍惚嗜臥者脾肺虛火四惡也六君

子湯加薑棗或補中益氣湯加麥門冬五味子心火尅肺金人參平肺散陰火傷肺腎氣丸料加五味子煎服 肩背不便四肢沉重者脾腎虧損五惡也補中益氣湯十全大補湯俱加山藥山茱

萸五味子

不能下食服藥而嘔食不知味者胃氣虛弱六惡也六君子湯加木香砂仁甚則加

附子挾痰者托裏清中湯挾火者托裏益黃湯

瘡腫時作嘔熱毒攻心潰時作嘔陰證潰後作

嘔脾虛如熱盛熾痛活命飲護心散作膿熾痛托裏消毒散膿熟脹痛托裏散或針以泄之熾痛便祕者內疎黃連湯寒涼傷胃者六君子湯加乾薑木香木乘土位加芍藥柴胡胃脘停痰加桔梗脾虛自病或水侮土加益智仁砂仁鬱結傷脾加川芎山梔蒼朮香附濕氣侵胃倍白朮白朮生肌斂口妙劑又有登廁觸穢乍嘔者仍宜補胃 脾肺俱虛七惡也補中益氣湯加薑棗或六君子湯

加炮薑甚則加附子或十全大補湯加炮薑

陽虛皆因誤服寒涼或潰後勞役或吐瀉之後或

誤入房夢遺或外邪所乘初則虛火假證仍發熱頭疼良久寒戰咬牙腹痛雷鳴泄瀉飢逆自汗盜汗陽虛寒氣所乘之證八惡也急用托裏溫中湯後用六君子湯加附子或加薑桂甚者用大劑參芪歸朮倍加薑附以手足溫爲度 潰後發熱惡寒作渴怔忡睡臥不寧陽裏陰盛發躁脈洪大

按之微細或無此陽虛極驀然牙關緊急腰背反張變爲瘡瘰陰病或無汗惡寒或有汗不惡寒九惡也俱宜八味丸料加參芪歸朮大劑煎服 原稟瘦怯或房慾竭精或瘡出膿多或誤汗下以

致日晡潮熱口乾作渴夜寐不著瘡出紫血四物湯托裏益氣湯腎氣丸主之 便汚黑者不治

便血瘀滯者犀角地黄湯救之 瘡瘍時或愈後口鼻吐衄牙宣齲露皆因瘡瘍出血虛火動而

錯經妄行當求其經審其因而治之肝熱則血妄行四物湯加山梔牡丹皮黃芩白朮肝虛則不能

藏血腎氣丸心火不能生血四物湯加炒黃連牡丹皮苓朮脾虛熱不能統血四君子湯加炒山梔

牡丹皮脾經鬱結者歸脾湯加五味子脾肺氣虛者補中益氣湯加五味子氣血俱虛者十全大補

湯陰火動者腎氣丸加五味子大凡失血過多而見煩熱發渴等證勿論其脈急用單人參湯補之

經云血生於氣苟非甘溫參芪歸朮之類以生心肝之血決不能愈發熱脈大者死 正傳以善

爲順以惡爲逆瘡瘍仍忌倒陷又增爲九逆殊爲有理 非癰非疽非瘡非癰狀如惡瘡或癰或

劇名曰無名腫毒隨其見證在表在裏在經用藥外以槐枝煎洗淨後以赤小豆吳萸白膠香黃連

黃蘗貝母硫黃糯米黃丹輕粉爲末麻油調搽一切惡瘡人所有識者皆同

疔瘡證治

經曰膏粱之變足生大疔恣食辛辣厚味炙燂腥羶及誤食自死禽獸蘊毒於中而卽發者有之或卒遇大風大霧大暑大寒天地暴沴之氣襲注經絡觸動其毒而發者或因感死畜蛇蟲毒氣而發者其死尤速初發或因衣物觸著而疼痛忽生或因發疹抓破而成痘僅一小瘡殺人一二日間比之癰疽尤毒

疔發無定處在肩背腰猶緩在頭面耳鼻口目舌根臂上及手足骨節間者最急如生兩足多有紅絲至臍生兩手多有紅絲至心生管面口內多有紅絲入喉者俱難治須急看以針挑撥其絲出血以泄其毒氣方可保生

瘡頭黑硬如釘四畔帶赤如火盤根突起寸餘隨變焦黑未幾腫大而光轉爲濕爛深孔透肌如大針穿之狀其形初起大小不一或如水泡如吳萸如豆如石榴子其色有五內經分經五臟各有所屬部位局方分別一十三種疔外又有魚臍疔瘡頭黑深形如魚臍破之黃水滲出四畔浮漿其毒尤甚用絲瓜葉連鬚葱韭葉搗爛以酒和服其查貼臑下如病在左手貼左臑下在左足貼左跨下右手足同在中貼心臍竝用布縛住候肉下紅絲處皆白則安有潮熱者亦宜却令人抱住恐其顛倒則難治或用蛇退燒灰雞子清調敷又一種水疔

用黃荊葉十四片獨頭蒜三箇百草霜二錢搗酒服取汗大效諸證惟嘔吐最危 治分虛實實

者初服賽命丹三丸以葱酒發汗表證多者追疔湯或敗毒散加蟬蛻殭蠶金銀花裏證多者活命飲五聖湯便利滿澀者黃連消毒散此散初起服之內消欲作膿者托裏消毒散虛者初服保生錠子以解毒或蟾肝丸有表邪不敢汗者補中益氣湯加防風白芷裏證不敢下者蜂蛇散腫痛欲作膿者托裏散內托十宣散不能潰者大料參芪歸朮補之或補中益氣湯合生脈散以防毒陷豁心氣者疔毒入心則神昏口乾煩悶恍惚似醉嘔吐不定危證也實者用萬病解毒丹以黃連當歸煎湯化下虛者用古芎歸湯加茯苓茯神遠志蓮肉清之毒上攻心嘔者護心散有因服賽命丹吐者亦宜此解之恍惚悶亂坐臥不寧煩渴身痛便秘者漏蘆飲子煩躁作渴者竹葉黃芪湯外者輕者單蟾酥爲末以白麪和黃丹搜作丸如麥米大用針挑破頂頭以一粒納入效重者賽金丹危篤者提釘錠子 凡暴死者多是疔毒急用燈照遍身若有小瘡宜急灸之并服賽命丹亦有復醒者如偏僻之處藥難尋覓唯灸有回生之功若專疎利表散者危

紅絲瘡證治

因喜怒不常血氣逆行而生於手足間有黃疸其中忽紫黑色卽有一條紅絲迢遞直上而生若至心腹則使人昏亂不收或有生兩三條紅絲者急以針橫截紅絲所到之處刺之令其出血以膏藥貼或嚼萍草根敷之立愈

多骨疽證治

此證由瘡久潰氣血不能榮於患處久則腐爛有骨脫出宜補脾胃壯元氣十全大補湯腎氣丸主之外以附子餅灸或葱熨法祛散寒邪補接榮氣則骨自脫瘡自斂若腎氣虧損其骨漸腫荏苒歲月潰膿出骨亦當用葱熨法若投以剋伐則正氣益虛邪氣益甚鮮有不誤 有上齶腫硬年餘方潰半載未愈內熱體倦作渴用補中益氣湯腎氣丸元氣漸復出骨一塊仍服前藥而愈有足背腫落一骨者有手背腫落一骨者

樓英醫學綱目 行年血忌

十歲二十二歲三十三歲七十三歲已上四人百神在上部不可患癰疽發背見血者死申子辰年血忌餘年不妨男女同 二十五歲三十一歲六十八歲七十四歲以上四人百神在額不可患

瘡腫見血者死

十八歲二十四歲三十五歲五十六歲六十七歲七十二歲八十九

歲以上八人百神在兩肩隅不宜患癰疽瘡腫見血者死

十二歲二十七歲三十六歲五十九

歲六十六歲九十七歲以上六人百神在中部不可患癰疽發背見血者死巳酉丑年血忌餘年不

妨男女同

三十二歲四十二歲五十五歲六十一歲以上四人百神在肩背不可患癰疽見血

者死

十九歲二十六歲四十九歲五十六歲五十七歲六十二歲八十歲九十一歲以上八人

百神在肝肺俞不宜患癰腫見血者死

十一歲二十三歲二十四歲五十八歲九十六歲以上

五人百神在脅肋不可患癰疽見血者死

十四歲二十九歲三十九歲四十六歲五十二歲六

十歲六十九歲七十六歲八十一歲八十八歲九十五歲以上十一人百神在下部不可患瘡漏疾

見血者死下部尤忌見勞瘵人不宜下部出膿難瘥

十一歲十五歲二十七歲六十三歲七十

五歲以上五人百神在尻尾間不可患癰疽見血者死

十三歲二十八歲五十二歲七十二歲

九十三歲以上五人百神在足下不可患癰疽見血者死

二十一歲三十八歲四十一歲五十

歲以上四人百神在遍身不可患瘡腫見血者不治